

*Sindicalista Rudy Geerman a baha como presidente di FTA***“Mi ta kere cu nos a laga nos organisacion na un nivel bon”**

ORANJESTAD – Ayera merdia tur delegadonan y representantenan presente den e di 22 Congreso General di Federacion di Trahadonan Arubano (FTA), a lanta para y bati man na momento cu e veterano sindicalista, sr. Rudy Geerman a baha como presidente di e organisacion sindical aki.

Bon Dia Aruba tabata testigo di e momento historico aki pa e organisacion sindical aki. Sr. Geerman cu 58 aña y yen di emocion y sentimento mixto a baha como presidente di FTA, despues di ocupa e funcion aki pa 18 aña.

Den su discurso di despedida como presidente di FTA el a bisa cu sigur tin tristesa pa e decision aki, pero e ta sigur cu esunnan cu ta feliz di e decision aki ta su famia. El a bisa cu na final di dia tur hende ta contento. E por a sinti e sentimento aki, ora cu tur hende a duna su persona un aplauso y tambe nan a lanta para, den e sala di reunion di e congreso aki na Alhambra Conference Room.

“Ta nifica cu na final di dia nan ta contento di locual bo a haci”, e sindicalista a bisa.

Satisfaccion

Sr. Geerman ta sinti su mes orguyo y satisfecho di por a



dirigi pa casi 20 aña e destino di FTA. “Mi ta retira cu un sentimento cu ta mixto, pero na final di dia bo ta convenci cu locual bo ta haci ta correcto”, el a declara na Bon Dia Aruba. E ta kere cu no ta bon ni pa su salud, tampoco pa e salud di e organisacion sindical aki, pa un persona keda hopi tempo como presidente. Aunke el a presenta su retiro como presidente e lo sigui traha di cerca cu FTA.

“Mi tin 58 aña, kiemen ainda mi tin mas pa duna”, el a declara. Aunke e no ta carga mas e maneho di e organisacion, sr. Geerman ta sigui yuda FTA como director di e departamento di Negociacion. E ta responsabel di tur

loke tin di haber cu negociacion, entre otro di Contrato Colectivo (CAO) pa su miembronan. El a bisa enfaticamente cu e no lo retira di FTA, ya cu el a asumi un rol di consehero pa e directiva nobo cu lo wordo eligi diabierna awor.

Tambe sr. Geerman su decision pa sigui den FTA tin di haber cu su colega sra. Adelita Tromp, kende tin hopi trahando cu e organisacion aki lo bay fin di aña aki. Den e situacion actual caminda un presidente nobo lo maneha FTA, y cu sra. Adelita Tromp -kende ta un persona cu hopi experiencia sindical- lo retira, e lo bira un situacion di hopi presion pa e directiva nobo. P’esey e lo sigui dunando conseho y compartiendo su conocimiento y experiencia sindical cu e directiva nobo.

Situacion actual di FTA

-Sr. Geerman, con bo ta laga FTA? E ta bon para of e ta den un situacion debil? Esaki tabata un pregunta cu Bon Dia Aruba a formula na e veterano sindicalista.

El a contesta cu FTA como tur organisacion tin su puntonan debil y esunnan fuerte. “Tin oportunidad, y tin me-



nasa. Pero mi ta kere cu nos a laga nos organisacion na un nivel bon”, el a bisa.

E ta haya cu no solamente FTA ta den un bon posicion sino cu e ta creciendo, ya cu trahadonan di companianan ta acerca FTA pa bira miembro.

E ta kere cu e obhetivo cu nan a pone na cuminsamento entre nan di un pensioen pa e sector Horeca tempo cu sr. Anselmo Pontilius tabata como presidente di FTA, a wordo logra. Despues cu sr. Geerman a asumi como presidente nan a bay pa e pensioen general. Un di e

puntonan cu nan a lucha pe tabata e reduccion di orario di trabou. “Nos ta firmando CAO caminda nos a baha di 48 ora pa bay 40 ora”, el a expresa. P’esey e ta bisa cu na final di dia e ta satisfecho pa e trabou cu el a desplega como presidente di FTA.

“Mi ta kere cu na final di dia si, bo ta satisfecho pa locual bo a logra. Claro bo por logra mas..”, segun sr. Geerman. Ya cerando e capitulo aki den historia di FTA como presidente di FTA pa 18 aña, sr. Rudy Geerman a bisa cu el a haci su esfuerso cu tabata den su alcance pa traha...□

**Sr. Hubert Dirksz candidato potencial pa bira presidente di FTA**

ORANJESTAD – E sindicalista, sr. Hubert Dirksz ta e candidato potencial pa bira presidente di FTA. Actualmente e organisacion sindical ta celebrando su congreso general di tres dia na Alhambra Conference Room. Y diabierna awor den oranan di mainta nan lo eligi nan directiva nobo.

Sr. Dirksz ta conta cu sosten

di e dirgentenan di FTA, asina presidente saliente sr. Rudy Geerman a declara. E directiva di FTA ta sostene nan compaño sr. Dirksz kende ta vice-presidente di FTA, y un persona cu experiencia y conocimiento den mundo sindical.

Pa hopi aña caba sr. Dirksz a ocupa diferente funcion den e directiva di FTA. “Ami ta kere cu e ta un homber ca-

paz. Y esey nos a bisa den e congreso cu e ta e candidato di e directiva”, sr. Geerman a declara.

Sinembargo lo tin un proceso democratico diabierna awor caminda cuallier hende di e organisacion sindical aki lo por pone su nomber disponibel pa aspira e cargo aki. Segun sr. Geerman, e mayoria ta conta den tur proceso democratico di eleccion y esey FTA ta tene na cuenta.□

